

皇

明

書

皇明書卷之三十三

新城草野臣鄧元錫錄

將謨

徐中山武寧王達鳳陽人幼倜儻沈雄有智畧年二十
十二高祖起兵授鎮撫并股肱心膂之契乙未
上爲濠舊帥孫德厓軍所得而滁陽王亦方繫德厓
以當之達身易上歸而鄧乃歸德厓以易達脫
上於迫故於上最親戰多笑多不戰而克故常專
征上親征常留守蓋其信也始從渡江下太平
已從定建康乃別將諸將浮江東下下鎮江兵不

血刃民晏堵不知有兵授翼大元帥丁酉克毗陵
轉徇寧國下之戊戌上征婺州王居守建康已
亥僞漢將趙晉勝營柵江擊破之進復池州上
時在浙東方虞京西捷聞喜甚擢同知樞密院上
還別攻安慶連破晉勝兵庚子從覆友諒帥于龍
江辛丑從破江州走友諒命守江州召還友諒卽
破江州上聞復遣還江州下之復破友諒兵壬
戌西攻武昌至沌口聞江西有內變乃大驚以爲
此京西上流不可緩急旋師討平之從戰友諒鄱
湖疾力冠軍上慮友諒乘虛襲建康命還居守

甲辰

上卽吳王位王爲左相國

上平武昌王

取廬州江陵常德夷陵衡州乙巳下淮東郡縣丙午受命專征吳會諸將圍姑蘇達念姑蘇堅難猝拔而士誠必死之寇非可旦夕下也令急攻克之必多殺士卒傷天子弔伐之仁乃築長圍困之架木塔與城中浮圖等立敵樓三層以俯瞰城中城中益急時僞將莫天祐守無錫與士誠爲聲援其部將楊茂善游水天祐遣爲偵爲邏卒所獲王釋而勞之待以腹心而茂乃爲王往來游徼具得士誠天祐虛實知城中大困乃急攻拔之縛士誠

送建康還克無錫得勝兵二十五萬封信國公是
歲冬克征虜大將軍帥諸將北定中原首克沂進
攻益都路下東平東阿濟寧克以東郡縣相繼降
明年 上卽皇帝位加中書右丞相克棣州樂安
遡長河入汴長驅克嶠函抵潼關 上幸汴謁行
在定計取元都北渡河取衛輝彰德廣平深趙出
臨清取德滄抵直沽獲海舟聯橋以濟師分水陸
軍而前薄元都攻齊化門填濠入王登門樓戮有
罪填撫降附規畫肅穆庶幾哉王者之師大者具
上紀中已承制立燕山六衛命孫興祖將以守禦

北平而身率大軍略保定中山懷慶轉入山西所
過視要害爲防守進抵大原時擴廓帖木兒已經
保安攻北平矣王召諸將與計諸將請還救北平
王曰不然擴廓千里轉戰以趨北平士勞頓孫都
督總六衛之師足捍禦之矣又行千里我卽還無
及也今獨疾抵大原傾其巢彼進至燕山不得勝
退無所歸所謂批亢擣虛者也若彼釋燕而還救
內爲我牽制千里趨戰此成禽必矣諸將曰善遂
進師擴廓帖木兒聞之果還兵用偏將軍郭英計
夜擣其營大破之擴廓帖木兒踰帳乘驛馬宵遁

遂克大原二年行略地陝西取鹿臺河中西安進
克鳳翔時張良臣守慶陽李思齊守臨洮王召諸
將計所向諸將咸以張良臣不如思齊才攻慶陽
視臨洮爲易欲先取慶陽達曰不然慶陽城險兵
悍攻未易猝拔臨洮西通蕃夷北界河隍得其民
足備戰鬪得其地足供軍儲當急下令以大軍蹙
之思齊不西走卽束手降耳臨洮克旁支郡自下
而慶陽可坐致也諸將曰善遂克秦隴鞏昌進攻
臨洮思齊窮蹙乃遂降良臣懼亦降而大師征平
涼已良臣叛王趣還西平會師破誅之初良臣之

叛也自恃慶陽城高兵精足可守而兄思道及王
保保於外爲聲援欲堅守以老師王乃遣兵抄其
出入之道分諸將各徼城四面以困之已而王保
保陷原州王以驛馬關當原州之衝遣右丞徐禮
將兵控扼之而馮勝駐軍驛馬關之東距慶陽方
一舍與禮軍相應復遣傅友德駐靈州審正駐邠
州葉國珍守彭原故王保保不能難城中乃大困
因克之并下平涼王保保遁出塞陝西平三年總
兵征沙漠大破王保保於定西古城獲王公而下
百人降其衆八萬保保絕塞遁別將孫興祖遇胡兵

於三不刺川力戰死右丞胡德濟與虜戰於莊浪沙
失利王斬將以肅軍械德濟赴京師師旋西取鳳
州自秦州南出百八渡克畧陽入沔而別將由鳳
翔入連雲棧取漢中乃西征吐蕃克河州極其肅
數千里乃還是冬大封功臣進魏國公授開國輔
運推誠宣力功臣特進光祿大夫柱國太傅中書
右丞相叅軍國事食祿五千碩與世券五年北征
取甘肅還命沿邊輯守北鎮燕自是十年不召十
四年將列侯北出塞擊胡十六年巡北邊訓士十
七年太陰數犯上將上心惡之乃自燕召王還

冬疾作十八年春二月薨年五十四 上慟悼罷
朝追封中山王謚武寧賜葬鍾山 上親製神道
碑文稱王言簡慮精當提兵時令出不二諸將敬
若神明攻城不屠戮受命而出功成而還一不自
矜伐至封姑蘇府庫克燕京財寶無所取婦女無
所愛可謂忠赤無疵光昭日月者也張我武成混
一區夏奠安人神之勞光萬世矣侑享太廟肖像
功臣廟位皆第一始王與 上比肩起軍中而王東
平強吳北定勝國燕趙中原齊魯關陝古阨塞形
勝之地皆兵不留行而定開拓混一之功十居八

九而王事

上最忠謹專征吳時遣人詣京師請

事

上手書勞王曰將軍天性忠義且沈毅善謀

端重有武今所請事率可便宜行顧軍中稟命此

賢臣事君之事吾甚嘉將軍然將在外君不御古

之道也繼自今諸軍中緩急將軍其便宜行吾不

中制

上嘗召王飲飲迨夜強之醉醉甚命內侍

送舊內宿焉舊內

上爲吳王時所居也中夜王

酒醒問宿何地內侍曰舊內也卽起趨丹陛下北

面再拜三叩頭乃出

上大悅方蹙元帝定西時

闕其圍一角使逸去常開平恚之曰昔人恨不得

當單于今得之奈何乎縱之王喟然曰元雖夷狄然帝天下之日久今得之能裂地封之乎抑甘心之乎皆不可則不如縱之去之爲得也開平意不愜旣罷軍先馳歸爲上言王故縱元主狀疑其心上信之北師還至龍江上命百官出都門郊迓王稱病臥舟中不起上親出郊勞又堅臥不起上乃入舟問王疾王乃持上踵而泣具道所以釋元主狀上爲釋然方攻姑蘇時見一女子有殊色以重幣結之期而遣已中自悔使人道意令他適父堅請如約王固謝負約終不從更

遺數十金助其資蓋厚德如此子四人長女爲
仁孝皇后王薨後三年子輝祖嗣魏國公事具忠
節傳中今世嗣不絕

常忠武王遇春懷遠人也性剛毅有大略膂力絕人
微時爲羣盜劉聚所得王察聚所爲終不能有成
欲擇所依已聞上頓兵和陽軍有紀乃棄聚自
歸以身得察於和紀乞充前部自効上慰諭之
曰爾自有主獨來就我食我安得爾留遇春泣數
行下伏地請不起上曰試從我渡江俟克太平
委身未晚也上舟抵采石元兵陣磯上而磯下

巨舟如緇距磯三丈許倅登難相顧莫敢先王乘
快舸繼至上麾之前卽捨舟挺戈大呼前一躍
而登手斬數十人衆披靡遂拔采石功冠軍上
大喜已從定太平授管軍總管丙申元中丞蠻子
海牙扼江上太平不通上慮諸將士渡江而父
母妻子留淮西有內顧心大患之遣遇春亟往攻遇
春設疑兵分其勢而正兵合戰身疾搥其中堅大
破之而勝國扼江之勢遂衰攻建康先登從徐將
軍克鎮江會青州軍叛與吳合圍徐將軍於牛塘
急王戰疾力解徐將軍圍陞統軍大元帥明年克

常州從下寧國池州又明年上克婺州以鎮國
上將軍同僉書行樞密院事守婺州降衢州庾子
召還從伐漢克安慶僞漢軍揚言出師爭安慶王
曰是必攻池州乃留羸弱城守而伏銳士於九華
山側待之漢果攻池州伏起俘斬萬人辛丑以江
南行省叅政從上破江州明年從上戰僞吳安
豐破其師遂圍廬州漢攻南昌急解圍還從上援
戰友諒鄱湖戰疾力敵將張定遠素驍猛奮前迎
戰王射之中乃走友諒退保鞋山諸將以友諒兵
尚強宜姑縱使得去王張目不言及我師出湖口

衆言江流湍急姑放舟下國再舉王又獨不言

上悟命悉舟扼上流王疾應之於是乃扼江而友諒竟誅是役也 上所乘舟及王舟皆膠於沙王

旣脫御舟而已舟被圍復力戰而脫爲尤功明年從平武昌已從大軍取廬州別將平臨江之沙坑

拾洞進取贛南安雄韶 上賜詔褒諭言仁者之

師非仁者之將不能今將軍破敵不殺與曹彬下

江南何異殆天賜將軍以隆我國家也吾甚嘉將

軍賜賚甚寵還取安陸襄陽已副大將軍東伐吳

從克泰高郵淮徐安豐濠宿諸州郡皆下進次自

太湖進趨湖之崑山遂進圍湖州攻之僞丞相張
士信悉發城中兵爲援屯舊營出我師之背王統
奇兵由大全港入營東阡復繞出敵背且填溝港
絕其還路士誠急出親兵來援敗復遣將徐義統
赤龍舟來援又敗而士誠親軍將度不支以舊營
軍降得以徇湖城遂下之乃會大將軍圍姑蘇圍
久士誠欲突圍出走戰盤門王急分兵北濠截其
後士誠銳甚戰未決王入陳中拊裨將王弼背曰
軍中皆稱爾猛悍能爲我取此乎弼卽揮雙刀奮
擊王乘之吳卒傷溺死沙盆潭甚衆士誠竟不得

出而吳平吳亡進平章軍國重事封鄂國公授勲
階是冬以征虜副將軍從大將軍北伐上卽位
加上柱國兼太子少保從下山東汴梁北至洛敵
兵五萬屯洛北迎戰王單騎手弓馳入陣敵攢槊
刺王王射中其前鋒大呼入降其衆而還遂下河
南遂從定燕都下保定中山真定遂次于大原主
刼營之畫而墻廓宵遁已從平泰隴元也速寇通
州王率所部擊走之已破開平元主又北奔大俘
獲而還次柳河川薨于軍上震悼追封開平王
謚忠武枢至龍江上親製文臨祭王爲人守謙

而不矜運籌決勝機應如響從大將軍居動遵節制至自將所至無前由智識明而神力雄故施各得宜也侑享大廟塑像功臣廟位皆第二長子茂封鄭公與世券罪失爵安置龍州次子昇封開國公靖難後失爵弘治五年錄後世孫復南錦衣衛指揮嘉靖中紹孫玄振嗣封懷遠侯

岐陽武靖王李文忠 上姊隴西長公主子也盱眙人初名保保世亂公主卒父隴西王貞携王是四方不能存 上駐師和陽貞携王來歸方十二上見喜甚文忠牽 上衣戲笑 上撫之泣曰外

甥見舅如見娘也取自鞠甚恩擇師教之賜國姓
今名丁酉以舍人統兵援池州戊戌下太平破苗
獠于於潛昌化盡獲其婦女畜產輜重士氣驕懣
王患之因激使其衆盡焚棄諸虜獲轉戰淳安夜
襲破僞元帥營薄嚴州取之張士誠率苗獠分水
陸道來攻時城壘新破賊猝至難守文忠逆戰大
敗其陸軍卽具筏寘斬馘其上令順流水軍見
大愕宵遁乃繕城隍樹樓櫓爲不可攻已取浦江
禁焚掠示恩信民大悅僞同僉員成率苗軍三萬
人降已亥會胡叅政大海攻紹興諸暨拔之吳又

攻嚴州王破之碧溪塢又破之胥口斬將以同僉
行樞密院事開府卽守嚴辛丑降建昌會苗軍帥
蔣英反金華殺叅政大海馳至蘭谿撫定之處州
苗師又叛殺院判再成總制炎王調兵屯縉雲遏
侵軼陞浙江行省左丞總制浙東軍癸卯諸暨守將
謝再興叛降吳導吳寇東陽王謂諸暨本浙東藩
蔽今叛去卽衢處危必急救乃晝夜馳百六十里
逆敗賊義烏乃行營諸暨六十里地並五指巖城
諸暨城方築時再興導吳軍旁抄東陽浦江義烏
以撓軍王提兵四面度緩急以應動克捷不旬日

城成乙巳僞吳將李伯昇率衆二十萬攻諸暨遠近
震懼王勒所部軍馳赴之去城十里所而營據險
自固守將危之間使稍避敵文忠笑曰以衆則我
非彼敵以謀則何詎非敵也伯昇陽淝水之戰詎
有衆乎若未戰而避則賊氣盛後難圖矣且將固
惟敵是求安避敵遂下令曰敵衆而驕今日之事
惟死無二乃捷捷則敵輜重皆汝等有也迨明王
持槩策馬從拾騎馳敵軍繞出敵陳後旋衝其中
堅所向披靡因督衆崩之敵師大潰城中將士出
夾擊俘斬數萬委輜山積而士誠氣益自是奪衰

丙午總水陸軍下浙西克桐廬新城富陽獨餘杭
守不下攻拔之將校請屠以示威文忠厲聲曰今
不下獨再興五子在故耳餘何辜釋不屠於是恩
信大著杭守將潘允明遣方爨詣軍門請降王問
爨何來爨對曰方大兵來民憚之如雷霆意當者
糜碎皆大恐聞公所在宣德意勞來安集民骨肉
相保卽鷄犬亦輯寧又人大悅以故爲杭百萬
人請命耳王察其誠至引入臥內留款飲因命畫
入城次第乃遣歸於是王整師前允明率所屬迂
之郊王慰藉而入具如畫整師入宿城上令軍中

有敢擅下城人民居者斬有一卒下借民金五錢
以徇未匝月而紹金台溫咸畢附卽軍中加浙江
行中書省平章事復李姓洪武元年將平閩貳年
以偏將軍從常將軍北擊胡出遵化敗虜將江文
清錦川次會寧追虜將也速灤河敗之斬名王慶
生進攻太興斬將遂克元上都會常將軍薨詔王
卽領其衆援慶陽軍抵太原聞慶陽破平而大同
圍急甚文忠曰本吾所以來者爲慶陽今慶陽拔
而大同受圍則移援慶陽者援大同固當且夫閫
外事苟利於國固將所得專也遂進師馬邑擒虜

將次白陽關擒虜名王時天雨雪王疑虜有伏身
引騎入山眺察之還王前軍業已去敵五十里而
營矣王還視驚曰此豈駐兵地乎虜猝夜劫營難
支也麾衆前五里阻水列營中夜虜果悉銳士來
攻營王堅臥不起令軍中蓐食以二營委敵使自
爲鬪天且曙王度虜饑疲乃徐起不介馬而馳分
左右翼薄其軍奮擊大破之擒其將脫列北追北
至莽歌倉而還三年以征虜左將軍總兵北征出
野狐嶺至空室腦兒擒虜平章及虜太尉遂進攻開
平克之盡俘元兩宮后妃諸王達官及得歷代玉

冊金寶圭竚諸重器以來班師至龍江 上親出
江上勞師封曹國公同知軍國事食祿三千石與
世券授勲階四年鎮成都民大和五年總東道兵
北擊胡戰疾力失道軍渴馬足跑地湧泉出軍不
乏困比年北出塞咸有功十二年理河岷洮鞏軍
十三年召還叅軍國重事十六年命兼領國子監
事十七年薨 上震悼輟朝三日追封岐陽王謚
武靖王器量沈閎人莫能測其際而仁孝寬裕好
學飭行旣釋兵家居恂恂如儒生晨夕必展謁家
廟時祭必齊宿三日在隴西王所言必稱小字祁

寒盛暑必冠帶侍立不得命不敢退痛公主早薨
語及必涕泗交頤下改營塋括髮號跣如初喪出
人禁闥上所履地未常敢蹈也凡行師未嘗妄
殺遺孩委道路者收養之惟旅拒携二者不得已
乃加兵及遇勅敵則鷹擊鷲奮蹈厲挺自前靡戰
不克吏卒按軍法行誅爲慘然不憚者終日部曲
病親視其醫藥死撫其遺孤得敵將故官隨材收
敘使不失所蚤師當塗潘廷堅後過當塗必詣廷
堅所謁之已乃就舍在浙東從老儒胡翰葉儀范
幹游聞性理之學嚴事之位中朝遣信往候必再

拜而後遣浦江鄭氏族同居十世矣避亂去依山
谷中王招諭使還戢士卒毋入其里門幼讀書不
滿十月而於經史奧義帝王理道之要古今興衰
治亂之統無不洞曉後留中參決朝政所區畫動
當上意上益愛重每侍中論康濟之道徃徃至
夜分然造膝議秘中外莫知者故無得而著焉侑
響大廟塑像功臣廟位皆第三嗣中絕弘治中紹
其後璿爲南錦衣衛指揮嘉靖中詔孫性臨淮侯
寧河王鄧愈虹人也魁梧有勇力父順起臨濠敗死
王年拾陸爲衆推代將遂能率部衆自歸從渡江

定金陵以元帥鎮廣德丁酉移戍宣州取徽州戊戌下婺源嚴州淳安庚子以僉書行樞密院移鎮饒州饒濱鄱陽湖而友諒據江州爲比壤數遣舟師來攻城輒敗去境內懷疑阻者推誠撫納之饒以大靖旁邑皆下時僞漢將鄧克明據撫州陽納欵而陰城守爲旅拒王知其情亟卷甲夜赴之旦入城克明單騎遁王令肅不撓民爭獻牛酒犒師悉却不受上親征江州下洪都王以江西行省叅政鎮洪都癸卯友諒悉力來攻圍洪都洪都急王與諸將堅守挫賊相持者三月卒成友諒之誅

甲辰從常將軍平臨江贛乙巳降僞漢將熊天瑞
平南安雄韶加湖廣行省平章事鎮襄陽時襄陽
多盜烽火相望民新附無固志上手書賜玉言
襄陽西扼巴蜀北控河洛吾京西大藩汝謹法度
施惠愛無罪者勿妄殺有罪者詳審古良將以仁
義爲先勇次之汝其勉焉王奉命日夜撫循其人
民襄陽以安吳元年陞右御史大夫洪武元年克
征戎將軍取江淮未下州郡攻唐取南陽降隋州
平商鈞房三年克征虜左副將軍從大將軍平秦
隴降河州下朶甘烏思藏封衛國公授勲階食祿

三千石與世券五年克征南將軍平溪洞蠻夷九年改征西將軍討土蕃十年督三道出擊窮追至崑崙山而還所捕斬功多獲馬牛半二十餘萬召還至壽春卒追封寧河王謚武順侑享大廟柩至三山門上親臨奠爲行視其塋地王器量沈偉事上二十餘年忠謹未嘗得過鎮廣德宣徽嚴饒撫南昌最後鎮襄陽凡八州所至謹法禮賢施惠懷綏軍民出專征臨大敵益奮而謙恭慎密不以功能先人有士君子風長子鎮封申國公卒無子失爵弘治中紹玄孫炳南錦衣衛指揮嘉靖中

子繼坤紹定遠侯

湯東甌王和鳳陽人幼卓越有奇志居常習騎射能指使其與游者羣兒長倜儻饒智畧壬辰歸滁陽王高皇帝取和州諸將皆滁陽客及部曲驕顧望不相下而王首以所部兵受約束惟謹從渡江定金陵從大將軍取鎮江丁酉克常州命鎮數敗僞吳兵已從平吳別將定溫台慶方谷珍走據福州洪武初元奉命由海道下福州進攻延平虜陳友定是歲扈幸汴梁與馮勝收澤路晉絳三年從大將軍入關從征定西大同封中山侯四年將舟

師平蜀降明昇五年從大將軍北出塞擊虜十年
進封信國公食祿三千石授勳階賜世券明年巡
撫西河州十四年從大將軍北伐下灰山又明年
經理四川永寧壩壕士馬十八年平五關山徭還
朝從容乞骸骨許之賜寶鈔造第鳳陽尋召諭曰
日本夷累擾我東海卿雖老強爲朕行視要地營
築增戍固守脩王行築海上起登萊抵淮浙凡五
十九城置戍還乃老二十三年元旦朝京師忽感
末疾失音不能言 上聞大驚駕臨視嘆惋久之
遣歸里第又明年召輿疾入見 上親撫摩之語

舊勞爲雪涕二十八年薨 上輟朝三日追封東
甌王謚襄武王沈毅質直勇而善斷入聞國論出
一語不泄凡出師奉詔卽行不復問家事臨敵果
敢堅忍未嘗挫衄有問兵書者輒笑曰兵臨陣決
機在智識敏達空泥古何爲家蓄媵妾百餘暮年
盡資遣去得賞賜推惠鄰父老及孤寡無告者
高皇帝末年事多故而王獨壽考以功名終子鼎
早卒再世以疾廢不得嗣弘治中五世孫倫紹封
靈璧侯嘉靖中卒子佑賢嗣而東甌有孫曰胤續
才守延綏死難才敏志捷善談論能文詞

黔寧王沐英定遠人八歲喪父母無歸 上憐而撫
之賜國姓爲子王厚重簡默韶壯侍 上側不狎
戲無隋容年十八授帳前都尉鎮京口洪武元年
以親軍指揮使取沿山崇安遂從克延平定閩命
復姓守建寧九年以都尉同知鎮關西十年克征
西副將軍伐蕃部川藏俘十三萬封西平侯賜勲
階授世券十一年克征西將軍征迄失迦夷之
擒洮州蕃酋獲馬牛羊二十萬還鎮關中已頻歲
北搜虜大擒獲而還十四年克征南副將軍從傅
將軍征雲南時元梁王據雲南不下遣將將兵十

餘萬屯曲靖防江以拒師師次普安王謂傅將軍
曰雲南險遠虜謂我疲於深入今未有虞心及其
無虞心可破也必兼道進師傅將軍曰善遂進師
師至白石江晨大霧四塞衝霧行抵江未涉而霧
霽則元軍壘於我軍業已相望矣虜見之大驚以
爲神錯愕失措傅將軍欲遂濟王曰我軍遠來利
速戰然步卒未集騎卒勞虜及我半渡而擊我勝
未可必也盍緩之乃陽陳兵爲將渡狀而潛兵從
下流先濟繞出賊陣後賊方駭注視而伏兵已鳴
角張旗幟呼譟矣敵大駭陣動王乃趣進師以猛

士善泅者先導師旣濟大戰虜大潰破之斬將俘
餘衆二萬悉縱之梁王赴水死父老爭出金馬山
焚香迎王師王入城秋毫無犯因遂平南中詔留
鎮雲南十七年平廣南蠻二十年誅閬峇鶴慶劔
州諸逋寇二十一年平緬蠻叛犯定遠衆號三十
萬驅戰象百餘以來勢甚獷王自將銳兵二萬往
調之遣都督馮誠以輕騎三百出嘗賊殺數百人
獲一象而還王曰吾知賊不足與也乃下令多置
火銃神機箭部分士爲三行約象且至前行銃箭
必齊發未退第二行繼之又未退第三行乃發銃

箭聲駭發象當走走而以大軍蹙之筏不勝矣於是命馮誠領前軍甯正將左湯昭將右申令曰今日之事有進無退進而捷一級必重賞退而却一隊必盡戮明日王登高丘以觀師蠻象皆披甲負戰樓若欄楯挾大竹筒於兩傍置短鎗其中乘以標我軍勢張甚陳及交我軍火箭銃砲雷擊電走山谷聲不絕象果駭走乃賊殊死戰左師却王命將急馳下取師首左師見之懼奮靡靡復前王責戰益急賊乃大敗斬首三萬級俘萬人生獲象七十四餘被矢如蝟毛而仆緬巨帥悍者被重傷斃

象背自是諸蠻讐服平緬歲入貢不復反矣明年
平阿資二十三年討教化三部及普安酋平之二
十四年平順寧蠻明年薨於鎮王在鎮八年不召
已召至賜宴奉天殿遣還鎮留鎮之明年哭 孝
慈皇后哀再鎮之三年哭 懿文太子哀甚因失
聲感疾薨訃聞 上哭之慟輟朝臨祭追封黔寧
王謚昭靖侑饗大廟王之鎮雲南也簡官僚剔姦
蠹嚴城堡通商恤下務農重穡墾田百萬畝軍實
裕而民不知擾士卒豫附暇日延儒生講經史大
義後愛讀通書西銘出師表揭坐隅時時觀又刻

白鹿洞規置學宮以風薨之日軍民罷市巷哭如
私親子春嗣侯春劾以功授督府僉事當比試
上曰兒本我家人何試畀實授命錄囚烈山審途
黨蔚州開釋各數百人及嗣鎮留意屯田水利征
叛夷輒功卒謚惠王弟晟嗣以平交趾封黔國公
世作鎮滇土至于今賴焉

傳將軍者潁國公友德也宿人廖將軍永忠樂人也
初傳將軍從明玉珍不得志走從陳友諒已率衆
來歸從征僞漢征吳從北征中原先登冠軍身被
創不死者數矣以剖符封潁川侯洪武二年上

下詔伐蜀遣中山侯和率舟師從瞿塘入廖將軍
副之傳將軍友德帥步騎從秦隴入顧將軍副之
上密諭傳將軍曰蜀人聞吾西伐必悉銳東守瞿塘
北阻金牛以拒我戰難正勝也我若出意外深入
搗階文將門戶墮而腹心自潰兵貴神速願將軍
慮之友德頓首受命馳至陝集諸道兵揚言出金
牛潛使人覘青州東陽果空虛階文雖有兵壘然
單弱於是走陳倉選精騎五千以從緣山谷晝夜
行大軍繼進遂克階州又進拔文州已渡青州白
水克綿州時蜀人阻漢川自固乃下令軍中造戰

艦百餘艘必濟師以木牌數千大書克階文綿竹
日月授之江順流下讐全蜀且報湯將軍遂進拔
漢州僞丞相戴壽帥衆數十萬扼舟師瞿塘聞友
德下漢江則大駭乃留兵守瞿塘而自引師援漢
保成都且至友德下令曰彼行千里還闔業聞我
師數捷心必搖又自戰其地勢必散可一戰而克
也率銳帥迎擊大破之遂拔漢州捷聞 上大喜
手詔褒美而勅讓湯將軍曰本所爲遣二將軍者
欲水陸並進使疲於奔命而克也今傳將軍率精
銳冒險深入克諸州今次于平川蜀無險可恃平

蜀此其日而云候水退乃進師將軍獨不念失事
幾乎時中山侯聞階文漢川拔意固奮及得讓乃
進師廖將軍部所部爲前軍時蜀人設鐵鎖阻飛
橋以扼關我舟不得進廖將軍計曰此難與力爭
蜀山多草木可計破也乃密遣壯士數百持糗糧
筒水爲飲食而衣青簑蔽草木魚貫緣厓石間舁
小舟潛行出上流蜀人不覺也度且至於是率精
銳夜從墨葉渡攻陸寨而舟師用鐵裹船頭置火
器於其前以乘之黎明蜀人盡銳來爭永忠已先
破其陸寨矣旣而將士舁舟出江上自上流揚旗

鼓譟下蜀人駭不知所出而舟師遂焚其鐵索焚
三橋而前遂入夔遂進師重慶僞夏主明昇詣師
降廖將軍諭令需湯將軍湯將軍明至乃受降而
傳將軍亦以克成都分兵盡下川蜀諸郡縣而蜀
平本蜀所以平者傳廖二將軍之力也凱還論功
上曰友德統軍冒險阻首克階文破綿漢成都克保
寧諸郡功最高次廖將軍於舟師爲尤功餘各以
差次受賞其後傳將軍從北擊虜出金蘭攻甘肅
至於瓜沙留鎮北平已脩兵延安十三年克征南
將軍將軍萬征雲南 上指授方畧而定元梁王

走死 具帝紀中友德旣盡平諸蠻乃因俗立法
定貢賦興學校掩骼瘞廣屯田南人大悅十七
年論功封潁國公食祿三千石賜世券後再征雲
南北征沙漠踰黑嶺至鑣子海窮熊皮山而還西
征寧夏橫驚萬里出奇無窮降王破國功甚夥後
坐黨暴卒子忠尚壽春公主爲駙馬都尉讓金吾
鎮撫而廖將軍當元季與父旺兄永安集衆保巢
湖 上在滁和欲渡江念獨乏舟楫永安請以舟
師從 上大喜因扈 上渡江而父旺老獨遣其
二子從師從定金陵從討江陰海寇永安陷敵永

忠以樞密僉院都總其兵 上率師伐友諒至安
慶敵固守 上以陸兵形之敵兵動永忠擊其水
寨破之從破江州已從討友諒鄱湖焚友諒舟從
平武昌拔姑蘇陞中書平章政事副湯將軍航海
取福州克征南將軍由海道定兩廣二年論功當
上公 上怒其使所善儒生窺我意邀封爵抑之
封德慶侯賜世券是年副湯將軍率舟師由瞿塘伐
蜀然後竟坐累卒子權娶湯將軍女又從征有功
得嗣侯

稗史臣曰予考觀 明武成之功而歎夫六王之

烈燁千古也施及于子孫 高皇帝起濠滁開創
業六師親征者惟僞漢餘皆以命將而中山王稱
元功最高平吳攘狄拓地萬里而終守純固不伐
能噉噉也韓彭有是哉開平少戇岐陽文武爲憲
與寧河東甌黔寧企著其恩信卽英衛蔑矣詩曰
四于時夏我徂維求定天祚我 有明之命於戲
盛哉

武定侯郭英濠人也沈毅多智有武力善射年十八
從 上起義兵定江東征無錫傷脇破常熟傷足
征安慶傷臂攻高郵弩傷膝 上征漢大戰鄱湖

英裊傷力疾乘海船鏖戰敗友諒于江口征武昌
戰保安門又傷手足方 上在武昌嘗於武帳中
踞床坐漢驍將陳僉同者舞榘直馳入中軍欲行
刺衆辟易 上大呼郭四急爲吾殺賊英挺鎗躍
馬奮臂呼賊應手斃 上大喜解赤戰袍衣之曰
唐尉遲恭不汝過也克廬江襄陽陞千戶克淮安
安豐陞驍騎指揮僉事從大將軍北渡河取彰德
廣平克燕轉戰晉冀關隴陞指揮副使破王保保及
察罕腦兒陞河南都指揮使赴鎮英有女弟爲
上妃 上幸其第遣餞之英素清儉賜白金二十

髡廐馬二十疋移鎮北平召進督府僉事從平雲南功多封武定侯食祿二千五百餘與世券克靖海將軍鎮遼東建文中從耿炳文李景隆軍靖難後罷歸第尋卒贈榮國公諡武襄方大師之攻通州也英距城三十里而營高壘深溝若爲持久計者衆請攻之英曰吾師遠來憊敵以逸待勞攻城非我利也宜致其師而敗之翌日大霧以千人伏道傍率精騎三千直抵城元將見軍少帥死士萬人張兩翼而出戰良久佯敗敵乘之伏中起斷元師爲二擒元宗室梁王遂克通州元主聞乃大懼北

遁遂下燕及圍大原擴廓帖木兒自燕旋師倍道
至勢銳甚萬騎橫奔傳將軍薛顯衝却之營城西
英憑高望謂常將軍曰彼多兵而不整大面無備
可刦也請夜往刦之常將軍然其計言之大將軍
許之會敵將潛使人約降請爲應於是先遣五
十騎伏城東十里期舉火鳴砲常將軍率大軍乘
之擴廓方燃燭坐帳中砲乃自軍中起不知所出
亟納靴未竟蹠一足踰帳後出乘驛馬從數騎遁去因克
大原鎮河南時河南新罹兵邑井蕭條盜充斥英
宣布威德綏輯流亡申寬政明賞罰遠近來歸者

以千計未期年戶口倍增移鎮北平河南士女遮
道留數十里不得行時北平初定羣胡反側英開
誠款諭以理亂禍福人心遂安英仁恕恭儉毋病
懸身燈告柔代卒廬墓三年毀瘠如一日御軍禁
虜掠戒殺降法將在軍親軍更直者荷戈環帳立
英北征一夕風雪大作悉罷遣歸營其恤士類如
此事 高祖四十年親倚甚而自處益謙家居不
治田產 上問之對曰臣一布衣荷 陛下寵靈
叨封爵子孫衣食足矣敢增益生其侈心 上嗟
嘆良久身大小百餘戰金鎗遍體然聞命卽日就

道未嘗以老疾爲解卒壽考始終云開國初嗣封
不絕者惟中山黔寧武定三人餘多罷廢 肅皇
帝時張孚敬桂萼議大禮廷議方洶洶嗣侯勛獨
爲之左右張桂因薦之得復保傅總提督郊廟工
又爲之起大獄扈 狩承天進翊國公後專橫論
死子守乾嗣英有兄日子典與滁陽王同名隸麾
下獨稱興從 上克滁和渡江定金陵先登以翼
元帥圍常州晝夜不解衣甲生蟣蝨鄱湖武昌姑
蘇諸大戰咸疾力從大將軍取中原守潼關爲三
秦門戶李思齊張思道日覬覦興厲兵積貯搯塞

固險屢敗其兵不敢東封鞏昌侯女弟入宮位寧妃有弟曰德成 具外戚事中

俞號國公通海巢人也世亂父廷玉弟遁源通淵寨巢湖自守與廖永安兄弟合肥人張德勝葉昇無爲人桑世傑廬州趙庸含山華高等俱會妖盜左君弼據廬州巢湖軍前戰不能敵聞 上駐師和陽書納款時 上方撫豪傑欲渡江得舟師乃大喜曰吾衆數萬已乏食欲渡江乏舟巢諸將以舟師來附殆天贊我也遂親率銳士行抵巢與諸將相結約遂拔以來從渡江而通海最親用以翼元

帥從攻鎮江常州宣城敗吳兵下之從復池州征
友諒拔九江掠蘄黃從戰友諒鄱湖疾力定出湖
畫楚之禁江通海功爲多賜金帛田從降陳理陞
中書省平章政事守廬州繕墉濬隍興農田兵民
寧輯從征浙西別將克太倉湖州戢士不殺戰士
誠執花塢蕩其營中流矢歸上臨視病親撫之
曰平章知予來乎通海不能語上揮涕出卒哭
之慟弟通源卽軍中代將從平吳嗣通海官後從
大將軍下山東河南山西諸郡別督師太原從克
張良臣慶陽西征王保保出連雲棧克興元皆先

登以南安侯從廖永忠伐蜀又從魏國出塞征甘肅皆最封功臣 上念通海功追封豫國公後改號國諡忠烈侑饗太廟父廷玉贈河間郡公通源封南安侯通淵越嚮侯二十二年通源鎮雲南還卒卒後逾年坐黨事死勿問而通淵失侯以家人還都建文初以豹韜衛指揮召禦燕戰沒白溝河而趙庸華高葉昇並得侯昇坐胡黨死張德勝桑世傑咸死難 具忠節傳中

馮國用定遠人丰儀峻整器量恢廓與弟勝並讀書自喜饒智畧射命中甲午兄弟同謁 上自歸

上見國用喜曰君被服類儒生豈嘗爲儒生耶因
問定天下之畫國用對曰金陵龍蟠虎踞真帝王
都願先拔金陵定鼎然後命將四出勿貪子女玉
帛掃羣寇以救生靈天下不難定也 上大悅引
爲心膂參謀議典親軍蓋是時諸忠智勇力之士
惟國用兄弟至最先乙未從渡江取太平擒義兵
師也先 上釋而用之令以元帥從 上行也先
軍屏宿衛獨國用一人留卧榻旁 上解酣卧衆
乃定已國用察也先有異志密爲防禍竟不得發
而斃居無何而國用卒 上甚痛惜親臨墓致奠

勝嗣掌親軍平漢平吳從定中原秦隴皆與有克
獲功三年論功封宋國公祿三千石賜世券勲階
上傷國用功未就追封郢國公四年鎮陝西五年取
甘肅至亦集乃八年自大同征散不剌還鎮陝西
十年鎮河南十二年董建周王宮殿大將軍北伐
以征虜將軍從節制河南軍 上勅勝曰今天象
有警其占在大梁乃爾所封邑宜防慎刺客未踰
月又勅曰天象屢見變秦晉二王今還都宜選精
銳嚴宿衛二王至宋國公迎都指揮守卽都指揮
迎宋國公守官軍三之一迎餘悉城守慎毋忽十

八年克征虜大將軍北征練兵二十年大師踰金山降納哈出驅其衆二十萬人以來輜重亘百餘里與鄭國公常茂計軍中事召還奉朝請二十七年上手詔諭勝言天道以有餘補不足人反其道乃以不足奉有餘朕命卿子鎮西鄙近以家人違令聞朕察言觀色良以不得所欲耳然小人畧無怨言誠可愛惜朕念卿兄弟相從開國有功且聯姻親不忍不爲卿言自後役人俾得從容衣食無窘迫自然効力下無怨言則家道昌矣勝爲偏將軍號勇悍善戰及爲大將軍稍廢紀律不及偏

將軍時金山之役有大功 上顧不悅卒贈卹稍
不及諸元勲

吳襄烈公良定遠人氣岸雄偉與弟禎俱以勇畧聞
從 上取滁和渡江定建康從下常州以鎮撫守
丹陽時張士誠踣有淮東浙西之地據姑蘇稱雄
富於京師密邇而江陰枕大江實當其要衝又士
誠多詐數以金帛啗將情其守乃移良以指揮使
鎮江陰尋陞樞密院判官諭之曰汝鎮守封疆約
束士伍毋外交毋納逋逃毋逐小利慎毋輕與敵
爭鋒惟固境安民而命其弟禎增兵助爲守士誠

率舟師蔽江而來建牙君山計必攻良以計破之
敵宵遁已侵常州良道督兵往援大破之殲其師
無錫自是敵舟師不敢沂江上金焦上召見慰
勞命館閣賦詩文賜之已僞吳以漢滅而惧以舟
師數百艘侵鎮江良嚴兵以待上親率水陸軍
討之寇乘潮逆拒陳方合良等縱兵夾擊大破之
寇退上行視江陰見良守禦甚設大稱嘆久之
太息曰汝非昔日之吳起乎稱嘆者久之良在鎮
江勇不妄殺持身甚約食不二味念鄰敵切境夜
往往卧城樓上枕戈達曙故寇至輒殄又以暇日

延師儒興學獎勵民節行士絃誦相聞民耻囂訟
居十年屯田平賦禁情詰奸 上有事江漢大軍
數動而東藩帖然軍民按堵良之力也時湯和守
常州耿炳文守宜興氣勢聯絡爲京東屏翰皆著
防禦功吳平移鎮蘇州衛武備益修軍民輯睦洪
武三年封江陰侯禎封靖海金食祿千五百石與
世券廣西右江叛克征南將軍討平之諸銅鼓五
開路騰源各溪洞蠻夷畢輸租奉法令八年徙民
田鳳陽副李太師督田齊王封齊州營王府卒青
州贈江國公子高嗣建文中守遼東數以兵攻永

平永樂中編氓江陰奪世券

楊璟合肥人本儒家子少沈毅讀書不舍章句好武
畧來歸授管軍萬戶以溧水句容金陵功陞管軍
總管以鎮江江陰功陞親軍副指揮使以發諸暨
功陞樞密判官從征交廣克九江黃梅廣濟立湖
廣行省叅政移鎮江陵平湖南洞蠻陞平章政事
克征南將軍取廣西降土官黃英衍岑伯顏還爲
偏將軍征山西平唐鄧南陽留鎮招諭明昇昇不
從璟作書與之具陳昔據蜀最盛者莫如昭烈孔
明相之訓練士卒財用不足取之南中然猶朝不

謀夕僅能自保足下疆場南不過播州北不及淮
中而欲以一隅之地綿頃刻之命可謂智乎若謂
險爲可恃蠶叢魚鳧之國當世有之足下亦不得
而有矣鄱湖一戰友諒授首旋師東討張氏面縛
此非人力實天命也友諒子竄江夏勢窮出降
主上宥罪封侯天下所知足下幡然覺悟自求多
福豈不賢哉凡今爲足下謀者初若可信然他日
或以郡獻或以城降各自爲身計取富貴當此時
老母弱子將安歸乎昇不能用洪武三年封管陽
侯食祿千五百石與世券從伐蜀失利不賞沅辰

蠻亂爲副將軍討平之佐大將軍鎮北平卒贈芮國公諡武信子通副將韃靼官軍戍雲南多道亡失侯

吳威毅公復合肥人甲午率衆歸濠從克泗滁采石太平陞萬戶定建康授總兵攻鎮江斬將守常州吳入寇力戰却敵從征陳理圍廬州先登攻漢沔下之授鎮武指揮同知守沔陽下汝州黃江陞安陸指揮使調征陝西土蕃克河州從潁川侯平蜀從衛國公平九溪蠻進督府僉事再征土蕃累功封安陸侯世指揮使從潁川侯征雲南兵皆定克

總兵官勦蠻寇取廣西轉餉盤江卒追封黔國公
賜諡賜子孫世侯復衝冒矢石體無完膚平居恂
恂至臨陳奮發無堅不潰子傑嗣從征失律失侯
諸皆世開國功其天下既定諸將守邊圉宜猷効
力者稱張溫唐勝宗馬雲葉旺之倫勝宗濠人從
平漢吳歷龍驤驃騎安豐三衛指揮封延安侯後
守邊鎮遼東威讐惠懷兵民輯睦在鎮二十六年
邊境肅寧溫不知何許人以指揮使守蘭州元將
王保保襲蘭州溫會諸將校計曰彼悉衆襲我將
兵寡難敵也今乘其始至又日且暮彼不知吾衆

寡可擊也必擊之挫其銳而後固守以待援於是
整兵出戰保保却敵圍城百餘日設方畧固守乘
其怠輒奮擊敵竟不得間而退事聞陞都督僉事
入謝 上諭之曰卿蘭州之捷可謂奇功夫將師
之道有功不伐則功益顯是故惟仁者不矜其功
而智者克成其名餘驕悍橫恣者或縱肆以取敗
亡則勇力有餘而仁智不足故也爾必戒之後從
伐蜀克階文平西蕃寇戎封會寧侯後坐黨獄死
雲旺鎮遼時遼東反側尚多雲旺帥部卒由登萊
渡海薄金州降胡元叅政葉廷秀攻平章高家奴

走之遂至鎮二人勇智兼濟同心經畧完城繕兵
守備甚設納哈出入寇雲旺命蓋州衛指揮吳立
等嚴兵城守虜至堅壁勿與戰及納哈出至見城
中備禦嚴不敢攻乃越益州城徑趨金州城池未
完軍士少指揮王富常勝聞虜至督勵士卒分守
諸城門選精銳登城以禦之納哈出裨將乃勅吾
自恃其驍勇率數百騎疾走城下呼挑戰城上發
勁弩射之傷遂獲之虜勢大沮納哈出慮援兵且
至引兵退走避蓋州由蓋城南十里外沿柞河遁
歸雲旺策其將退先移兵柞河自連雲島至窟駝

塞十餘里綠河疊氷爲牆以水淋之經宿皆凝洳如長城藏釘板於沙中設陷馬奔於平地伏兵以待之命老弱捲旗登兩山間約聞砲卽豎旗令指揮周鶚等各肅兵以俟虜至四顧寂無人則前旺等俟其過城南砲發而伏兵四起兩山旌旗蔽空鼓聲震天矢石雨下虜駭倉惶北奔趨連雲島遇氷城馬不能前皆陷入穽中途大潰馬雲亦於城中出兵追擊至將軍山畢栗河斬戮虜人馬及凍死甚衆旺等復乘勝追至猪兒峪獲其士馬無算納哈出僅以身免賜獎勞擢雲旺並都督僉事

何真東莞人少英偉好書劍元季棄官保鄉里爲衆附平羣盜有王成築十砦自守圍之久不下真募人能縛成者予鈔十千於是成奴縛之以來真笑謂成曰君柰何養虎爲患成慚謝奴求賞真如數予之已使人具湯鑊駕轉輪車其上成惧以爲將烹已也惶懼請命真曰君何恐已乃縛奴於車上促烹之使數人鳴鼓推車號於衆曰四境毋或有奴縛主以罹此刑也又使數人鳴鉦督奴妻炊火奴一號則羣應之曰四境或有奴縛主者視此於是人服其賞罰有章以爲光武待蒼頭子密不及

也競歸之遂併有循惠潮諸州之地元授分省左
丞嶺表以安後歸命上恩賚甚至授江西行省
叅政轉山東右布政使致仕又命以集廣東民兵
遷湖廣左布政使致仕封東莞伯二十一年卒子
榮嗣後坐黨死失封是時懷遠人李質以起義兵
保鄉里衆頌推守德慶繕兵浚城隍有保障功居
恒戒所部毋妄殺毋擄掠有執敵來獻者多給衣
糧縱遣之家故饒舉以賑施其三族與鄉里流寓
之貧者以故一時名士如茶陵劉三吾羊城孫仲
衍率往歸之國初全城歸附上召見慰勞擢中

書斷事尋超授刑部侍郎晉尚書慎刑獄加意哀
矜有淑聞會開浙江行省拜叅知政事鎮之質至
振紀綱正風俗勸農興學居三年績最上念其
老召還許致政時召見賜坐便殿訪時政已復起
爲靖江王右相勅獎諭甚厚自元亂兵爭乘時奮
起者莫不剝下自封樹威虐自恣惟直質本仁好
義庇賴其鄉族及一時與金自歸者多望罔糜爛
而二子獨矜然以完名終豈可謂無天道哉

夏音虔國公顧成其先湘潭人往來江淮間遂居江
都貌魁梧壯勇質直有胆喜習武事自文身誇異

人或謂之黔徒非也從 高皇帝爲親兵侍 上
出入忠謹無過初授百戶後累功進都督僉事建
文中以右都督從盛庸戰真定被執 成祖愛其
勇畧解縛令輔世子居守燕事定封鎮遠侯永樂
中出鎮貴州辭於文華殿曰 皇太子曰殿下於
事君父恤軍民皆素行誠篤臣何言惟於小人當
置之度外凡事有天理無爲深計也意爲漢府也
至鎮申嚴號令威信並行諸蠻臺羅寨叛種威之
羣蠻震懾卒年八十五贈夏國公諡武毅蠻中祠
祀之國初功臣未有壽考如成者孫嗣侯溥鎮湖

廣擒貴苗 僞王通滇蜀道復爛土長官司設都
勻府溥清慎囊無餘資卒國公懋爲率布帛供殮
諡襄懋子仕隆嗣侯好文諱武總京營兵寬簡得
士心鎮淮安總漕廉幹不苛率贈太傅諡榮靖子
寰嗣靖恭廉明爲時論所歸

稗史臣曰余次鄭端簡異姓諸侯表洪武中開國
功臣封者公七人侯二十九人伯二人其後中山
侯和進信國公穎川侯友德進穎國公征西功得
侯者十有三人平雲南侯三人征胡征南各一人
征蠻公一人皆戰功可述視前代名將甚夥矣其

後功高過大疑積累深藍胡黨獄法吏深詆寵祿
浚剝宗姓殲夷亦運會然哉 成祖靖難以九門
壩上白溝滄洲蘭城夾河靈壁七戰論功其後比
驅殘虜南定交會西靖羗東捕倭將校畢以次封
賞而定興王輔稱獨烈矣事大者 具帝記若百
夷誌中

皇明書卷之三十四

新城草野臣鄧元錫錄

名將

定西侯蔣貴江都人永樂中起小校累功世昌國衛指揮同知又從征北虜九龍口大松嶺功陞都指揮僉事克叅將擊番賊深入奪橋冠軍進同知鎮守松番討平叛羌陞都督僉事克副總兵盡平諸番陞總兵正統元年陞右都督總兵討賊王阿台擒乃顏刺忽李羅封定西伯七年征木麓川功進侯貴奮起卒伍能與士卒同甘苦凡出境搗賊衣

糧器仗身自囊負不役一人臨陳冒危險衝敵爲
士卒先所向披靡雖目不識字短於謀畧然天性
朴忠忘已下人故能有成功登上將爵通侯爲一
時名將卒贈涇國公孫琬嗣侯總兵甘肅顧能劾
御史罪狀曰臺官豈盡桓典耶操江上六事極言
江防護南京根本宜控扼要害克平胡將軍禦邊
數有功卒贈涼國公謚敏毅今嗣侯

山襄毅雲直隸徐州人深沈有將畧工騎射永樂中
以指揮從出塞歷功陞都督僉事宣德中克征蠻
將軍鎮廣西廣西溪洞徭僮叛服不常歲殺掠吏

民先守將韓都督觀英武有文頗尚誅殺雲至嚴
號令公賞罰而靖以寬仁與僮酋戰臨機制變身
先士卒所向有功三年討柳潯賊斬殪二千五年
討平樂蠻斬四百討慶遠諸蠻斬七千四百自是
蠻夷畏服嶺南無警七年進都督同知雲沈毅不
洩用兵如神廉正自將淡然儒素馭土官嚴征調
與克期無敢後先者鄭牢者老隸也性鯁直敢言
雲呼牢試問曰世恒言爲將者不計貪廣西饒珍
貨汝試言我可貪否牢曰白袍點墨終不可漁雲
笑曰人言土夷饋送苟不納彼自疑且忿奈何牢

曰居官黷貨於國憲甚嚴公不畏朝廷顧畏蠻子
耶雲舉手禮牢曰教我教我雲受盡言牢敢言人
兩難之是時邊將稱武安侯鄭亨陽武侯薛祿清
源伯冀傑武安治大同有威嚴前呼出街前犬豕
皆走避過神廟祠宇不一顧惟過城隍舉手曰大
歌好照顧而已陽武築獨石隆慶諸城躬勤旦暮
軍中肅然所過無毫髮科擾撫士卒臨陳有進無
退及病革語不及私惟曰此國家後門我死矣後
來何人勿壞我守事語訖而逝清源起卒伍守關
平著威信恭謹有大節漢賡人反時諸將或言漢

王三少子機不可測侯奮翼曰高煦誇詐無膽畧
何足爲死逆順曲直分明而上以天威臨之又
何異三將不日擒耳漢平稱元功

定襄伯郭登字元登臨淮人武定侯英諸孫也七歲
讀書過目輒成誦十歲能文辭永樂中克勛衛正
統初從征木麓川有功十四年虜入寨急進都督
僉事副廣寧伯劉安鎮大同會上親征前軍覆
虜告學士曹鶴張益言駕宜從紫荊關亟入徑
無虜憂折而東向居庸虜猝至難解矣言不用而
六師大陷時大同堡塢蕭條城門晝閉軍士存者

皆創殘無固志登涕泣撫循焉死問傷親裏瘡藥
士皆感戢或謂登曰今時事至此城旦夕且破何
空自苦乎登曰天誠祚國家當無可憂之事卽
不然吾誓與此城相存亡終不令諸君輩獨死也
處危疑而氣益壯繕城練卒晝夜彌厲也先奉

上皇至城下索金幣萬計約賂至歸 駕登門

不納對曰願天地社稷之靈國有君矣 上皇

朕與登有姻婣何外朕若此登擐甲登城北面
拜曰臣奉命守城義與城存亡不敢擅啓闕
袁彬以頭觸門呼廣寧伯安及給事王

霍瑄令出見納賄安邀登出見登曰虜不可測吾
二人者以守土爲職脫有變將柰社稷何莫若以
計伐謀劫其營奪 駕入城因召壯士與之盟激
以忠義曰事成當封侯受 上賞壯士皆踴躍願
自效或以危言沮之虜驚疑擁 上皇去登大慟
而罷時賊勢張甚廣寧伯安名他故還京師獨登
留守十月虜犯京師登率所部糾忠義從鴈門入
援先以蠟書馳奏言胡馬長驅三關失險賊留內
地爲患非輕臣今悉起官軍民壯入衛京兵擊於
內臣擊於外使賊有腹背受敵之患此扼吭搗背

勢也奏至優詔褒荅時國遭大變庶事搶攘無紀
登䟽言虜騎雖回傳需春草生復入雖未必信
臣竊危之拳拳勸上推誠待下久席求賢擴天
理克人欲親賢遠奸爲之本且曰誠令虜入京軍
新集可養銳不可浪戰可用智不可鬪勇此謂知
彼知己可守則守也其涿水易州真保之間皆當
堅壁清野京軍分據犄角以逸待勞以主待客勿
求僥倖務在萬全此謂不戰屈人兵善之善者
也歷陞右都督自虜勝來出入縱橫我師無敢對
敵者登晝夜拊激將士懸賞格殺賊會賊入境登

師躡之行七十里至水頭日已暮休兵以覘之夜
漏下二鼓東西沙窩賊營者十二掠朔州而來或
言賊衆我寡莫若全軍而反登曰我軍去城已百
里卽退避而賊以鐵騎蹙之欲自全何由立按劔
起曰敢言退者斬遂徑薄賊營會天且曙賊迎戰
登親陷陳遂破之追奔至拷佬山大捕虜而還進
定襄伯是役也登以八百騎破虜騎千羣爲一時
戰功第一時鎮守內臣貪忌登譖之 景帝召內
臣還留登鎮登思得公廉有爲者共事乃疏言往
承平乂而人心驕居官蒞政蕩無廉耻釀成汙濁

之風是有夷狄之禍今大同一鎮爲敵首衝及今無事不早爲豫計一旦賊至復如前日無所措手矣欲大興屯田畫方畧以上登爲將智勇兼備嚴紀律料敵制勝動中機會一歲中百戰未嘗挫衄常恨馬少步追賊不及乃設攬地龍飛天網等法鑿爲深塹覆以土木人馬通行如履實地虜人圖中令人發其機自相擊撞頃刻間十餘里皆陷用砲石一擊五百餘步賊以爲神自是憚懼不敢入窺大同邊登初至鎮士可戰者不及數百馬百疋不數年馬至萬五千疋精兵數萬人天順元年奪

爵戍甘州成化初復爵鎮甘肅未幾召還練團營
兵卒贈侯謚忠武登性至孝母疾兩刲股作羹以
進居喪哀毀骨立不肉食咲語者三年所上章皆自
爲草詩豪宕有唐人風方太上北狩時都督施聚
者北通州人也守遼東聞慟哭卽日引兵西裨將
進牛酒不受曰主上安在疾馳抵京師天順初
以功封懷柔伯聚智勇朴直與士卒同甘苦增遼
東障寨興修儒教虜人畏服卒贈侯謚威靖

裨史氏曰郭定襄忠孝大節與岳武穆同功諸廉
潔好謀撫士卒有恩亦輒與相類蓋良驥匹力也

方守大同時微侯通社稷君臣大義屹然不拔西
北障其搖哉國有虎臣社稷焉依定襄近之矣
楊武襄公洪六合人世漢中百戶嗣官調開平善用
奇擣虛累功都指揮正統初內臣疏洪短詔械內
臣理洪又舉洪功勵諸將洪益自奮尋以都督守
獨石敗虜大石門寶昌州捕虜多正統十三年封
昌平伯克總兵鎮宣府虜畏洪呼爲楊王土木之
變以兵力少閉門避不擊虜退逮詔獄虜寇京師
出獄中令自效與孫鏜范廣等擊虜涿州紫荆關
連敗之追至固安又捷轉戰千里捕虜多進侯賜

世秀還鎮卒贈穎國公賜謚洪爲將嚴紀律敬慎
自將不專殺宣德正統景泰中稱名將諸大臣皆
重洪威畧左右之指揮杜衡誣論洪詔卽訊得白
部卒復誣奏洪上付洪自治以故洪感激戮力
子傑嗣侯上書言臣家一侯三都督諸蒼頭得
官旗者十六人臣無以堪乞停蒼頭職役許之未
幾卒庶兄俊嗣侯慷慨善文墨頗不法爲葉叅政
盛所糾下獄降都督府僉事後嗣侯坐法失侯天
順元年石亨坐俊附于少保斬西市洪兄子信從
俊征累功都指揮僉事柴溝戰比有功克叅將再

守懷來會洪病協守宣府陞總兵佩將軍印鎮延綏虜入寧夏與武平伯陳友於安邊營夾擊敗之虜遁去封彰武伯移鎮大同成化二年毛里孩入河套出沒塞上上召信問方畧信請馳精騎疾走至榆林關條便事上上從之已命爲平虜將軍信至延綏勵兵秣馬以待烽火嚴虜間諜不得入突入塞信縱兵邀擊小龍州鐵青源虜錯愕遁去明年還鎮大同虜又入延綏塞信曰虜走延綏計大同兵西救必乘虛東掠乃引兵西援而設伏胡柴溝待之虜果至伏發擊斬功多自是虜不敢

輒入塞與世伯券卒贈侯謚武毅

朱永夏昆八世留守指揮僉事景泰中父謙守寧府
與虜戰首功中律封撫寧伯天順初以北狩過宣
府謙出謁頓首哭獻犒軍得贈侯因稍進用永爲
將慎重不泄令嚴整四年虜入敗去召總兵三千
營已兼總神機營時定襄伯登鎮甘肅薦留練團
營成化二年荆襄盜僭號克靖虜將軍鎮荆襄搗
巢功進侯乞推父謙虜入大同克平湖將軍禦虜
虜退入榆林克平虜將軍禦虜比有功卽軍中進
侯立號總制三邊與世券虜入柳樹泖而軍永出

奇邀戰大敗之已戰海東山功最賜券世公弘治中卒贈寧平王謚武毅

王信字君實陝西南鄭人世官寬河千戶父忠征迤北戰沒信生方半歲母岳氏持節長之詔旌門忠臣節婦正統己巳拒虜戰西直門冠軍擢永清衛指揮僉事景泰乙亥從征五開諸蠻平之遷同知天順辛巳從破曹欽東市遷指揮使成化初尚書王翱薦鎮守通州改守倒馬關虜憚不敢近石和尚劉千斤反信守備荆襄聞變卽師數十騎馳據房陵時民兵僅數百人賊數千餘奄至合圍亟攻

而大師逗遛救不至相持四十餘日不解命死士
出城五六里多張旗舉火以譟賊賊以爲援至驚
潰追斬六十級陞都指揮同知鎮臨清決獄明慎
請托不行鎮湖廣條軍民機務八事又條四事爲
著令永順保靖二酋長世讐殺諭以威德悉奉約
束靖州及武岡蠻乂不靖守臣議勦信巡邊竟不
煩兵而下召諸苗犒以牛酒諭逆順苗稽顙謝曰
累歲苦麾使徵索故疑懼今將軍待我如此願致
死不恨因請爲舁肩輿以示敬於是信疏言湖廣
蠻夷雖云腹中之蠹實無能爲但邀功者顧倖其

竊發以爲利今但選精銳加防守而靖之以恩信
其患自息荆襄流逋意獨逃避徃役伏山谷今已
長子孫濫加誅殺匪直死及無辜抑且致傷和氣
且其地田高濬易旱潦南畝之農歛穫未竟餓糧
已空機杼纔停布縷何在求免饑寒而不可得乞
選公正仁惠者爲守令大加存恤濫陞武職無慮
千百無一矢之勞冒崇階之賞乞查勘削奪三司
方面所以折衝禦侮承宣激揚者也當公以格物
廉以律已乃端本澄原在朝廷而已部將劉斌張
全智勇可任信力薦於朝且言英俊之士處心剛

正寧肯抑心低首奔走媚求若不曲加攬延則志士陸沈誠可悲痛陞都督同知總漕運卽日上道語人曰荷國恩未報此行當以江水洗滌肺腑少盡區區耳帥府舊有湖官漁利其中命開通以泊運舟凡公私勢要奪水病運道者一裁以法信沈毅簡重平居默坐讀書被服儒素出入省騶從人莫敢犯歷大邦三十年不營私產筭無華衣廐無肥馬而故人昏喪傾貲營助之鈴閣之下寂無人聲劉宣嘗言予在本兵日每用一將官思得如王君實輩人了不可得子繼善從善皆舉進士有名

咸寧伯仇鉞江都人世指揮同知克寧夏遊擊將軍
驍勇敢戰正德五年安化王寘鐫反陷賊中京師
訛言鉞從賊又訛言興武營守備保勛者故與賊
聯姻爲外應閣學士李東陽曰鉞必不從逆勛獨
以姻聯故見疑將與賊通者懼不敢自歸白遣勛
爲叅將鉞爲副總兵令討賊居無何勛疏至自言
臣母及妻子俱陷賊中然臣義不顧家恨不能飛
渡黃河食賊肉報國時鉞陷賊中輒稱疾卧家不
起而陰約遊兵壯士伺大軍至從中發爲應俄
蒼頭沒河潛入言諸軍已於河上列營矣鉞念寘

鏞所與謀者將獨何錦周昂乃嗾人謂寘鏞宜遣
錦急出守渡口防決河灌城又遏東岸兵勿令得
渡錦果出已又稱疾亟周昂入問疾陽僵卧呻吟
言旦夕且死昂頗聽而蒼頭倅起掎斬之鉞立起
披衣使劒跨馬出一呼諸遊兵壯士皆集遂奪城
門擒寘鏞馳以聞封咸寧伯與世券已從平流賊
進侯子鸞嗣以途誅

朱錦衣驥世錦衣籍性度寬厚涉獵書史初襲衛正
千戶少保謙以女妻之天順初坐累謫戍成化初
雪得還任累功遷都指揮使十四年掌錦衣衛

印兼理機密驥寬厚不苛時重妖言禁有妖僧真
惠僞爲書惑衆爲邏者所獲株連數百人當坐死
驥曰首事者獨僞書餘皆愚民何辜悉未減活之
凡制獄下錦衣所司輒用大挺以厲威驥獨否
憲宗嘗怒言事忤旨者令撻之或譖其用小挾
上大怒遣中使詰責驥從容言 天威嚴重誠不
敢過用以傷至仁且以待察也卒不易弘治初遴
選軍官兵部獨疏驥老成敦厚得大體官二十年
而卒

牟錦衣斌字益之世錦衣籍弘治中爲錦衣鎮撫忠

厚有大節戶部主事李夢陽以應詔下獄斌卽訊問曰壽寧事本中胡不指事撻指其爪牙夢陽曰慮對耳斌曰指則我能據事實剪其羽翼何對獄成斌參之僅曰原情應詔論法亦違而壽寧所計奏十事悉弗入夢陽得釋正德初言官劉蒞戴銑等數十人一時下獄斌輕刑緩械曲爲申救有任御史者自愬實他出爲諸僚上奏時列其名斌曰古人耻不與黨人爾乃悔爲忠耶瑾令奏當去銑疏首權闖字斌不肯曰存此則諸君子臣節他日可白昔鄒道卿以失原奏被禍吾其敢自爲計犯

公議乎奏當上瑾大怒又偵知斌庇言官矯旨杖
闕下幾死瑾誅復官會長子死工部贖三百金斌
指其兩子曰斌不道天禍一子夭矣苦受金行且
及此後竟以忤中貴安置武昌卒斌性清約痺屋
敝衣再遭禍怡怡若分然崔銑論正德中全臣節
大學士劉忠尚書傅珪及斌惟三人斌前錦衣稱
袁彬後嘉靖中稱王佐訊張鶴齡之獄以忠勤廉
勁有名

都督馬永遷安人世金吾左衛指揮好讀左氏春秋
及兵法機警善射正德中江彬統宣府兵練西內

卽自稱疾篤不隸彬以叅將守太平虜入塞再創
去克總兵官治三屯盡簡諸軍散遣其老弱聽其
農市取其庸倍給諸健武者健武卒咸奮習武藝
益精當是時漁陽一軍稱獨雄未幾上至喜峯
口馳馬欲出塞永扣馬諫不可上注視久之顧
內侍曰此馬永耶咲而止朶顏酋把兒孫結諸虜
邀官賞不得輒入塞永迎擊再敗之自是效順保
塞嘉靖初大同軍亂殺都御史張文錦叅將賈鑑
朝議且撫永力言不可撫他日九邊効尤將有河
北藩鎮之禍勅永出居庸討賊以流言而止疏乞

宥大禮言官奪總兵寄祿南京十二年大同軍再
亂召至業已撫復還南十四年遼東軍亂召總兵
遼東十八年軍再亂以家兵捕斬軍遂定陞左都
督卒於遼遼人爲罷市哭喪過漁陽漁陽人亦哭
罷市兩鎮皆祠祀焉永爲將善調虜情先知所從
來及衆寡因勢設伏以故虜徃徃失利去善養士
卒同甘苦又善知人所獎拔列校皆拔起爲方鎮
云

梁武壯震新野人世榆林衛指揮使忠勇好讀書嘉
靖中協守寧夏興武營最先登破虜進游擊將軍

益憤志撫士卒東西援應有斬虜功進副總兵撫
延綏以總兵鎮守陝西當是時關中少虜患改大
同大同自殺總兵李瑾而來諸鎮巡內惴每甘言
煦之不如意卽反唇瞪目或飛章訛言相搖撼震
得命卽率家丁五百人馳至軍申嚴約束曰我無
爾陵爾無我叛王法軍令具在我不敢破綱紀誤
國家其家丁又健鬪無不一當百鎮兵稍歛縮時
出塞頗有斬獲功十八年鳩卒拾餉修五堡身先
勞苦軍中不敢譁五堡竟復虜不敢近塞後五堡
廢而虜入營中逾大原窺平陽矣震在邊專練家

丁時時出塞却虜營虜不敢輒近塞得虜營馬盡
與諸出塞却者故人皆效死趨利故虜益畏之或
謂震出邊起釁者曰起釁律有之謂承平時虜牧
獵爲生不擾邊將撲殺邀功也乃今虜數深入駐
帳塞官堡民堡十去七八而獨禁我師出邊不已
悖哉震卒贈太保謚武壯家丁無歸守臣以聞令
入伍與衣糧邊將頗賴其用戚將軍景通字世顯
定遠人其先百戶祥以畧地戰死世襲登州衛指
揮僉事景通長幹修髯類關壯繆旣世官踐更京
師常席地讀書當暑不輟劉瑾結豪傑爲逆陰遣

人遺席帽約曰某日發難著此者爲劉景通旦日
爲黃冠遁去將率六郡良家子赴不測瑾敗乃還
青州賊李琪反據蒙陰山王副使良臣分部擊之
弗克景通微得琪與姦民出入狀將數十騎往跡
琪夜至伏姦民舍旁遂禽琪頃之劉賊起河北橫
行山東景通檄守鄒以七百人往入門告毋而遂
行師出平度道中忽遇賊人曰賊衆我寡盍避諸
景通曰彼卒遇我夫安知衆寡且成師以出義不
避難陳以待賊擊卻之遂入鄒登陴誓衆嚴守備
一日帥輕騎過孟子庄賊大至列陳如前邀賊遊

騎擊殺之賊復遁先後累數十捷卒保境嘗六月
過戰場僵屍枕藉衆皆掩鼻不欲近景通曰偉哉
國士名與骨俱香吾誠得與同遊九原無憾矣爾
曹顧病之邪騎過沮澤中率先下得休其餘力遇
賊輒有功兵罷以軍政掌印部使者舉孝廉陞江
南運糧把總至則祛積襲卻羨餘比輸太倉故有
鬻籌之弊客以告作色曰景通自結髮事君壹勿
欺吾寧受簿責毋寧自欺已輸倉不中計對簿度
支當降級所部張千戶者懷贏金三百餽之景通
笑曰吾以不欺受罪顧納贏金爲欺耳事白復官

戚勲以總督備倭至欲引將軍爲同姓景通謝曰
先世故姓倪載在勲府卽自附璽書之謂何卒却
之拜總督備倭陞山東都司僉書陞大寧都司掌
印河間治河久未底績屬爲植不踰月而告成大
寧缺僉書一人部署匈奴內附者景通言安榮可
榮奉百金爲壽目攝之曰吾薦賢故薦君以此相
加則吾薦非也榮慙而退奉詔坐神機營毋閫貞
節年老矣請終養從之仍支俸山東使奉給景通
白首子舍每上食率諸子女弄雛前卽不當毋心
蒲伏請受杖毋有疾夜叩北辰請身代居喪毀斑

白始有子曰繼光繼光綦履過庭將軍大詎曰童子何知綦履必錦衣錦衣必肉食爾父清白必不爾饜爾他日將饜卒伍以自封旣知爲外民所遺卒裂綦廢勿着居第垂二百年始改作命綺䟽四戶列兩楹間工請益綺䟽十二景通曰使吾無得罪於先世猶聚族於斯四戶足矣不然此且不保鄉人私語曰孝廉何以遺後世景通呼其子問曰繼光爾以吾果無所遺者乎則憾者乎吾遺爾不貲貯之帝所矣繼光曰大人所遺高高在上吾何患盜焉季年畫策備胡累數百牘其後趣繼光受

職京師執繼光手謂之曰吾道若者毋輕用繼光
躍然曰兒當求增何敢輕用病旣革猶問吾所上
備胡封事上納之乎未耶垂絕舍人納褚幣裒中
瞪目曰我平生不索人錢寘司必不索我錢悉出
之乃暝後繼光著戰功爲東南名將第一別有傳
沈都督希儀其先臨淮人也廣西馴象衛世指揮使
未弱冠已能馳馬手搏賊征永安盜陷淖中騰而
及於陸三酋前趨之希儀捩頸以過鏢排右足讓
刀顧射鏢者中央項死又掣刀斫刀酋於鎧間斷
其頰車又射其弩酋竟却其追兵而還蓋果銳如

此遷指揮僉事荔浦賊八千人行剽歸倉卒部五百人往扼之蛟龍滑石兩灘相去數里希儀曰滑石灘狹行引繩乃濟雖衆可薄也蛟龍灘闊衆成列難圖矣吾欲奪其闊而致之狹伐岸竹揭岸上編筏以爲緣頃刻成數百旗挿之蛟龍灘令羸卒數十人守之以疑賊賊果趨滑石徂半渡發伏擊敗之遷都指揮同知嘉靖六年岑猛叛姚督府鎖奏行誅召與計曰歸順岑璋猛嬖翁也當助猛柰何希儀能素得土官陰事曰璋女失寵而璋心恨猛貌合耳是可使擒猛何謂助乎督府復曰猛乘

上流勢擁兵下如建瓴邕梧危矣柰何希儀曰是
不足憂土官大率飽富貴戀巢穴所爲叛者俱誅
耳豈有遠志乎督府又慮猛且走交南曰猛走交
則閉不能歸彼豈無慮哉於是督府分五哨進師
希儀將中哨當工堯工堯隘而糧盡乃潛渡江詣
左哨將乞糧請分兵攻工堯左哨以分地爲解希
儀笑曰兵糧吾自足試君心耳還夜分軍三百人
緣山上繞出工堯背而煮餘糧爲稀糜食士合戰
戰疾力而所遣軍則已立幟工堯山頂矣賊大囂
遂入隘得其積粟食軍乘勝攻田州初歸順岑璋

素信希儀使圖猛則遣兵二千人陽助猛精卒千
人名護女實爲間官軍得工堯則先囂工堯破猛
出走則擁入歸順左哨將知之壓歸順境索猛歸
順斬他囚首以獻而先一日希儀以獻猛馘梟軍
門矣督府議設流官希儀曰思恩設流官反側至
今兩賊行合從且復起不見聽而田州果叛後竟
復土官而田州乃平擢右江叅將右江故治柳州
柳在萬山中城外五里卽賊巢軍民至無地可田
而城中兵弱不足任前守劉璉殪於賊希儀至鼓
士氣破賊調者耳目徧官府卽閨闥中稍動色賊

在谿峒數百里外趣知希儀至顧令熟徃恣出入
嬉游城中而求得與徃通商販者數十人厚撫之
使爲調於是賊動靜聲息顧徃徃爲我所先得所
鵬勦風雨來去每出勦卽肘腋親近不得聞至期
鳴號則諸兵立集聽令曰出某門旗頭卽引諸軍
貿貿行問旗頭旗頭自不知頃之劄營賊衆至戰
方合而伏又左右起賊大敗去已賊寇他所官軍
又已先在雖絕遠村聚賊度官軍所不至者寇之
軍又未嘗不在賊驚以爲神卽官軍亦不知希儀
何自得之也所鵬勦必其劇巢縛管繩爲記無妄

殺於劇賊巢得婦女牛蓄果鄰巢者悉還之惟陰
助賊者還軍立勦曰若柰何陰助賊戰或刀弩而
門矚者曰罰若牛五若柰何刀弩矚我師於是賊
讐服無敢陰助賊及門矚者嘗欲勦一巢乃佯卧
病所部入問病謝不見明日入問希儀起曰吾病
思鳥獸肉若輩能從我獵乎卽起出獵去賊一二
里而止營軍中乃知非獵也最後計擒其尤黠猾
善戰者支解之四懸城門見者股慄常以甚雨淒
風天冥冥夜察諸賊所止宿散遣人齎火若砲衣
毳帽與草同色潛巢賊中夜砲舉賊大駭曰老沈

來矣挈妻子蒲伏山頂兒啼女咷徃徃寒凍死或
觸厓石死妻子相怨汝作賊何利至此明調之則
寂無人所散遣入他巢者亦然他巢大驚已相聞
愈益驚陰調之則老沈固在叅府不出也自此賊
膽落或易面爲熟徃而柳城旁一童子牽牛行深
山無敢調者矣後熟徃旣伏公威信調征他巢雖
懼讎不敢不徃甚而大雨徃惧失期汨溪水以應
要有溺死者論者以爲自廣西爲將韓觀山雲之
倫能使徃不爲賊比希儀則能使徃人攻賊前此
未有也思思奏設流官而州人數反側不靖已聞

濬有子曰金在鎮安益洶洶曾楊留者在賓州乃
辭去曰留小主人在請往希儀時方憂思思聞留
言則大駭以金去賓州近而留應之且爲賓州憂
賓州危則廣右之咽哽立梗矣乃挽色好語謂留
曰是岑濬第九子耶我徃征田時固聞之因作自
語狀曰岑氏其復乎欲以深動留已呼留入密室
要賂卽得賂行爲金復官留乃大信且出復呼入
曰韋貴徐五今分將思思必仇金善防之於是金
果將二千人因留以見門者懼走報請無納希儀
罵曰金本土官子非賊柰何不納則引入厚結之

又引以詣兵備隨盡散其五千人卒縛金而思恩
復寧當是時非深計賓州幾失希儀在柳度十三
年移瀘後總兵貴州會北虜入寇詔屯宣大未
幾署都督總兵江淮已復調廣西貴州在江淮
販之警幾絕然天雨輒苦創痛數在告已還廣西
瓊南五指山熟黎本馴順畏法知州邵濬者黷貨
虐使之而黎叛兵八年不休希儀言於督府曰法
家斷獄必分首從今諸相煽從逆者如虎投奔勢
不可釋它諸亦疑而勦之豈有定哉且疑而勦之
則傷仁撫而勦之則墮信莫若獨搗其首惡首惡

平諸異志者禡魄矣是公以生賜萬州也都御史
必進聽之而黎平進都督同知賜金幣改貴州入
銅平巢甚竒然秘不告人人亦莫知也希儀膽勇
機警言善撫諸人爲耳目者賞不失頃刻嘗染危病
所部卒至自戕於神前以禱穿手刺股痛毒諸體
者皆編最後者一人至以箭穿喉其得士如此唐
太史順之言余宦游得當世名將數人北馬永梁
震西河鄉南希儀震與鄉予未之識而識希儀永
承魁環長偉見人類首下視寡言笑希儀短小精
悍自炯炯燭人議論磊落激發皆所謂偉男子也

故撰次其事希儀謂余言當世固多良將患在牽掣齷齪不能展嗟夫若希儀猶爲未盡其用哉
俞大猷其先鳳陽人世爲泉百戶髫髻時輒倜儻以豪傑自命家酷貧日不能再爨顧誦讀不輟銳意文事已父卒襲官學騎射輒命中從李良欽學擊劍盡其術益悟常山蛇勢以爲兵法數起五猶一身五體雖將百萬之兵固可使合爲一人也嘉靖中登會舉高等以千戶守金門上書部使者言兵部使者呵辱之奪官大猷笑曰此豈吾自見地耶遂盡鬻其家遊京師以書干毛尚書伯溫翟侍郎

奎翟得書驚嘆禮之驚一軍然終不盡用乃奉勅
守汀漳遷廣東都司會安南叛人入欽廉爲寇諸
司議募陸兵大猷曰賊由海來獨當以海舟破之
若專脩於陸賊舍此擊彼我不勝其脩賊不勝其
擊彼逸我勞非計也乃多集海舟以擊之連破之
永安萬寧而安南函賊首以獻倭難作大猷以南
直隸副總兵戰賊平望王江涇六金壩皆連捷而
提督尚書張經以視師趙文華言論死大猷坐落
職奪祖官於是東南之禍日亟復浙直鎮守而大
猷言防江必先防海水兵急於陸兵蓋倭奴長陸

戰令樓舡高大集萬鉞其上倭舡遇之輒摧壓焦爛固我兵所長也善戰者毋以短擊長而以長制短且海戰無他法在知風候齊號令以大舟勝小以多勝寡耳於是用舟師戰而舟山積歲不除之賊皆勦盜王直者徽人也以亡命入海據烈港勾倭夷貿易爲逋逃主天子以連歲倭變劇皆直故必得之至勤精裡責督府胡宗憲令必得自効大猷言直在海島能以繒物誘倭來在彼國則一逋逃夫耳倭之來不來非關直誅不誅也若誘之來而殺之則失信且何以示後盍請諸宗憲不聽

誘以來 天子聞得直則大喜詔殺直於是宗憲
恚失信怏怏曰吾爲俞帥笑矣而羣倭聞殺直焚
舟殊死戰大創入掠閩宗憲懼乃奏言大猷違節
制不窮追以爲解而大猷逮詔獄謫戍邊饒平民
張璉反僭名張官流陷江閩諸州縣詔諸道合師
二十萬討之而大猷遷南贛將時胡宗憲已奉詔
兼督江廣矣聞璉出行剽下檄言賊棄巢出此自
投死其速擊南贛將大猷前以違節制見劾幾得
罪欲言恐禍及欲不言恐敗事已乃曰吾豈以一
身之禍忘國事哉乃具言璉雖離巢出劫其妻子

財寶乃在巢若我以大軍迫其巢彼必聚衆自救
譬之虎方逐鹿熊據穴而搏其子虎安得不置鹿
而還還而蹙之如拉朽矣且三省會擊有期又豈
可以數萬之師從一夫圍走哉於是引兵萬五千
人疾走栢嵩嶺瞰璉巢而軍作伏具知賊果歸保
巢而大猷出擊俘斬者千餘於是潛使說璉黨執
已璉爲兩廣帥所奪或請頒之大猷曰賊惡其不
滅豈必在己翌日班師不殺一人以示信陞副總
兵賜璉書加節鉞命控制江湖閩廣四道兵加祖
官一級會倭陷興化大猷自贛晝夜馳赴之駐秀

山都督劉顯駐明山而都督戚繼光提浙兵未至上怒督府失泉城責戰急而閩士夫又洶洶急功大猷念賊且萬人能戰入死地官軍數僅相當若迫城而攻之彼實我虛彼飽我饑彼逸我勞一挫而東南之事去矣不若列營以困之彼欲攻柵以遁則彼虛我實彼勞我逸彼饑我飽而我師犄角取之可使子無遺且速戰勝亦可遁負亦可遁此賊之利也遲戰則我兵日多守益固而賊日益困敵以戰爲守我以守爲攻於是星布兵營畫地鑿溝令東西通而列柵其上賊挑戰不動閩士夫訟共

詎病之已竟殲賊諸將各加秩而大猷止賜金幣
蓋閩士夫業已爲流言聞之朝矣倭三萬寇潮州
與盜吳平相犄角爲廣患詔移鎮潮廣羣盜憚大
猷名競出降吳平雖不能堅決然亦詭殺倭自效
遂與倭人絕於是大猷請於督府都御史吳桂芳
曰韃賊以出邊爲生路山賊以歸巢爲生路今潮
兵驅賊入益深益深則益以鬪耳是死路也當大
集精兵十圍五攻無使片甲得還如兵力單若不
勝又散之令得遁去則遷曠日久爲勞費無已也
於是將漳兵二萬以來果破平而御史以招吳平

爲大猷負坐免官都御史爲抗言於朝乃得留二
源山袤千里賊據峒如蜂房水窩介三郡六縣之
間而雲溪尤固大猷曰此當誘而聚之者也遣王
鸞者盛騶從克裨將爲死間賊得鸞自安而大猷
日發兵擊旁諸巢之未下者以趣之諸巢果畢聚
雲溪以緩討乃陽言誅李明過雲溪巢賊出牛酒
犒兵須臾兵悉集擊破之於是賞先登酬死間而
東峒遂平桂芳上其功雲董五哨十萬之全師如
奕棋着着先手剪三郡六縣之妖逆如振落次次
剗平以爲方叔元老之猷云大猷爲將未事先必

周慮爲萬全旣事則往往爲善後長久之畫爲人
易間無町畦而有容善忍以忠厚自任重然諾功
則稱人罪則稱已叅將湯克寬罪抵死大猷力爲
當道言克寬忠勇慣戰請保任不効甘同罪詔獄
時妻子寄食甚窘百戶鄧城亦就逮適有遺數百
金者立與之諸推轂楊弘舉曾清之倫皆大聲疾
呼期必用後皆爲名將禮布衣士爲上賓平生諸
蒞官訾衆陳師鞠旅營室興事卒一決於理雖支
干孤虛雲物氛祲堪輿奇遁兵家以爲務者未嘗
一訊焉譚侍郎綸與書言綸近對人言節制精明

公不如綸信賞必罰公不如戚精悍馳騁公不如
劉然此謂小知誠如霍子孟任如諸葛亮大如郭
子儀忠如文文山毅如于肅愍可以托孤寄命則
公之大受然也公精誠當不以老衰不爲時變哉
益信重如此諸語具出俞集而士大夫稱平閩浙
功最者往往推戚將軍繼光